

Սա արդէն բացարձակ պատերազմ էր Հոռոմի դէմ, որ հայ ժողովուրդը ընդունում էր միահամուռ կամքով: Ու հասկանալի է, որ Տակիտոս գրում է այս մասին.—

«Արտաւազդի որդին Արտաքսիաս (Արտաշէս), որին իր հօր ողբերգական մահը դարձրեց մեզ անհաշտ թշնամի, Արշակունիների օգնութեամբ կարողացաւ պաշտպանել ե՛ւ իր անձը եւ իր տիրապետութիւնը»:

Տակիտոսի այս վկայութեան մէջ կարելուք են երկու կէտեր: Առաջին, որ Մեծն Տիգրանի թոռը Արտաշէս տակաւին ուժգնօրէն շարունակում է իր պապի սկսած կռիւները Հոռոմի դէմ, եւ երկրորդ, որ Հայաստանը ինքզինքը պաշտպանելու համար Արեւմուտքի ոտընձուցութիւնների դէմ ստիպուած է ձեռք մեկնել պարթեւական Արշակունիներին: Ուրիշ խօսքով՝ Փոքր Ասիական հաւասարակշռութիւնը որ հաստատել էր Մեծն Տիգրան, խտրուած է արդէն շնորհիւ հոռոմայեցիների, եւ Հայաստանը Արեւելքում իր գոյութեան համար իսկ իրեն զօրավիգ է փնտուում: Ասել է, Մեծն Տիգրանի թոռն օրօք իսկ, ի յայտ են գալիս Հայաստանի նուազումի եւ բեկումի արտասուալի հետեւանքները: Արեւելքի եւ Արեւմուտքի մէջ ամբողջ հայկական թումբը արդէն աւերուել է, Հայաստանը՝ թուլացած ու նկուն հոռոմայեցիների երեսից աջ ու ձախ է նայում եւ իրենից դուրս յենարան է փնտուում:

Հոռոմը այնուհետեւ կ'աշխատի, հայ եւ պարթեւ հնարաւոր զինակցութիւնը անկարելի դարձնելու համար, իրեն հաճոյակատար թագաւորներ նշանակել Հայաստանում եւ ազատուել հայոց Արտաշէսեան տոհմի անվերջ ըմբոստացումներից: Ուրիշ խօսքով՝ վերացնել բուն Հայկազեան Տան հարստութիւնը: Բայց, Հոռոմի այդ կարգի փորձերը միշտ էլ կը մնան առանց որեւէ լուրջ հետեւանքի:

Հայ ժողովուրդը շատ սերտօրէն էր կապել իր անկախութիւնը իրեն մտերիմ ու հարազատ այդ արքայական տանը: Նա շարունակ ու յամառօրէն մերժում է օտար եւ իրեն խորթ իշխաններին, որոնք իր աչքում միշտ էլ մնում են որպէս մարմնացումը՝ աւելի Հոռոմի ատելի գերիշխանութեան քան ազգային անկախութեան:

Ըստ երեւոյթին, Մեծն Տիգրանի եւ իր նախնեաց ստեղծած հայ ազգային ազատ, կուռ ու զիտակից ինքնուրոյնութիւնը տուել է արդէն իր պտուղները: Մեծն Տիգրանի հպարտ եւ աննկուն ոգին ապրում է սերունդների սրբտունմ. նրա հսկայ բազուկով ստեղծուած մեծ ազգային շարժումը այլեւս չի կանգ առնում: Եւ Հոռոմի համար Հայաստանը շարունակում է մնայ իրբեւ ամենէն ըմբոստ եւ ամենէն անընկճելի, յամառօրէն ոգորոզ մէկ երկիր:

Եւ ամէն անգամ, որ Հոռոմը որեւէ թէկուզ վաղանցուկ տիրապետութեան համար յաղթանակ է տանում Հայաստանի վրայ, դա համարւում է խոշորագոյն յաջողութիւն այս կամ այն զօրավարի կեանքում եւ անհուն ցրնծութիւն է պատճառում սենազի, որի հաճութեամբ եւ հրամանով անմիջապէս շրջաբերութեան մէջ են դրւում նոր դրամներ ի յիշատակ Հոռոմի համար այդքան բախտաւոր մի անցքի:

Մերթ սնապարծ Մարկոս Անտոնիոսն է դրամ դարկում իր եւ իր հոմանունու նկարով շուրջը գրուած՝ Armenia devicta, — «Հայաստան պարտուած»: ուրիշ դէպքում, ինչպէս Օգոստոսի ժամանակ, Հայաստանի պարտութիւնը խորհրդանշող մի նոր դրամի վրայ տեսնում ես աւանդական «Յաղթութիւնը» (Victoire) որ զսպում է մի ամենի ցուլ՝ Հայաստանը, այսպիսի խորագրով՝ Armenia capta, այսինքն՝ «Հայաստան գերեալ»: Եւ վերջապէս ահա այս առջեւիս սիւնի արձանագրութիւնը, ուր գերմանների ու պարթեւների հետ յիշատակուած է Հայաստանը՝ իբր ըմբոստ ու պայքարող, որ ընկճուած է կատաղի կուռից յետոյ Bello maximo Armenia devictis, — «Հայերը յաղթուած»:

Եւ այս առթիւ Մ. Ալեքեւրուս եւ Լուցիուս Վէրուս զօրավարը, որ կուռեց Արեւելքում, կոչուում են՝ Արմենիքուս:

Փաստն այն է սակայն, որ բոլոր այս կռուիւները եւ այս յաղթութիւնները անգոր են եղել վերջնականապէս զսպել Հայաստանը: Բընորոշ է, այդ տեսակէտից, որ Օգոստոսի նըշանաւոր ու քաջամանօթ տախտակի վրայ Հայաստանը, հակառակ Հոռոմի պատմիչների այս տարփողած յաղթութիւններին, չէ նշանակուած կայսրութեան միացած նահանգների մէջ: